



REPUBLIKA E SHQIPËRISË
AVOKATI I POPULLIT

Mekanizmi Kombëtar për Parandalimin e Torturës,
trajtimit ose dënimit të egër, çnjerëzor ose poshtërues

Adresa: Bulevardi: "Zhan D'Ark" Nr.2
Tiranë, Shqipëri

Tel/Fax: +355 4 2380 300/315
E-mail: ap@avokatipopullit.gov.al
www.avokatipopullit.gov.al

Nr. Prot.
Nr. Dok. 201801995/2

Tiranë ___/___/2019

Lënda: Rekomandim për inspektimin e kryer në Komisaratin e Policisë Nr.1,
Tiranë.

Drejtuar: Z. Oltion AGOLLI
Shef i Komisarimit të Policisë Nr.1

TIRANË

Për dijeni: Drejtues Madhor Ardi VELIU
Drejtor i Përgjithshëm i Policisë së Shtetit

TIRANË

Drejtues i Parë Kastriot SKËNDERAJ
Drejtor i Drejtorisë Vendore të Policisë

TIRANË

Të nderuar zotërinj,

Avokati i Popullit, në rolin e Mekanizmit Kombëtar për parandalimin e torturës, trajtimit ose dënimit të egër, çnjerëzor ose poshtërues, në vijim Mekanizmi Kombëtar,¹ bazuar në nenin 19/1 të ligjit nr. 8454, datë 04.02.1999, "Për Avokatin e Popullit", i ndryshuar, kreu një inspektim në Komisaratin e Policisë Nr.1, Tiranë. Inspektimi u krye në datën 20.09.2018, sipas një Plani Inspektimi të miratuar nga Avokati i Popullit.

Në përbërje të grupit inspektues mori pjesë znj. Ermonela Xhafa, Komisionere e Mekanizmit Kombëtar, z. Sotiraq Nushi, me detyrë Nd/Komisionerë pranë Seksionit të Veçantë dhe Besnik Deda me detyrë Nd/Komisionerë pranë Mekanizmit Kombëtar.

Inspektimi kishte si qëllim verifikimin e respektimit të standardeve të përcaktuara në ligjin nr.108/2014, "Për Policinë e Shtetit", Urdhrin e Drejtorit të Përgjithshëm të Policisë së Shtetit nr.1102, datë 07.11.2017, për miratimin e procedurës standarde "Trajtimi dhe sigurimi i personave të arrestuar/ndaluar në ambientet e Policisë së Shtetit, evidentimi dhe zgjidhja e kërkesë/ankesave të tyre", Urdhrin e Drejtorit të Përgjithshëm të Policisë së Shtetit nr.306, datë 31.03.2016, për miratimin e procedurës standarde "Rregullat teknike

¹ Neni 74/1 i ligjit nr. 8328, datë 16.04.1998, "Për të drejtat dhe trajtimin e të dënuarve me burgim dhe të paraburgosurve", i ndryshuar.

të shoqërimit në polici”, si dhe zbatimin e rekomandimeve të Avokatit të Popullit të bëra gjatë inspektimeve të mëparshme.

Institucioni i Avokati i Popullit, pasi u njoh me konstatimet e grupit inspektues ka detyrimin kushtetues dhe ligjor t’ju parashtojë konkluzionet përfundimtare, duke ju referuar si më poshtë vijon:

Shënime paraprake

Në përputhje me metodologjinë e zhvillimit të inspektimit në institucionet ku mbahen e trajtohen shtetas të privuar nga liria, grupi inspektues u takua me z. Oltion Agolli, Shefi i Komisarariatit të Policisë nr.1, i cili u vu në dijeni lidhur me qëllimin e inspektimit. Në vijim drejtuesi i komisarariatit informoi, mbi masat e marra për realizimin e rekomandimeve të lëna nga Avokati i Popullit në inspektimin pararendës, lidhur me plotësimin e kushteve dhe kriterëve për ndërtimin e dhomave të shoqërimit dhe dhomave të sigurisë, sipas akteve ligjore dhe nënligjore në fuqi për këtë qëllim.

Grupi inspektues, pasi mori informacionin e nevojshëm lidhur me qëllimin e inspektimit, zhvilloi inspektimin në ambientet e shoqërimit dhe ato të sigurisë, vizitoi disa nga zyrat e punonjësve të policisë, si dhe u njoh me të gjithë dokumentacionin përkatës ku pasqyroheshin veprimet e kryera nga punonjësit e policisë me personat e shoqëruar dhe të arrestuar/ndaluar. Theksojmë se, drejtuesi i komisarariatit dhe punonjësit e policisë u treguan bashkëpunues dhe transparentë gjatë komunikimit dhe inspektimit që zhvilloi grupi inspektues në ambientet e këtij komisaritati.

Nga informacioni i grumbulluar në vend gjatë kryerjes së inspektimit, rezultoi se gjendja e ambienteve të shoqërimit dhe ato të sigurisë, nuk kishte ndryshuar nga inspektimet e mëparshëm që ka zhvilluar Institucioni i Avokatit të Popullit në këto 3 vitet e fundit. Më konkretisht, nuk ishin zbatuar rekomandimet që lidhen me:

- ndërtimin e ambientit të shoqërimit, sipas procedurës standarde “Rregullat teknike të shoqërimit në polici”, miratuar me Urdhrin nr.306, datë 31.03.2016 të Drejtorit të Përgjithshëm të Policisë së Shtetit;
- ndërtimin e ambientit të sigurisë, sipas procedurës standarde “Trajtimi dhe sigurimi i personave të arrestuar/ndaluar në ambientet e Policisë së Shtetit, evidentimi dhe zgjidhja e kërkesë/ankesave të tyre”, miratuar me Urdhrin e Drejtorit të Përgjithshëm të Policisë së Shtetit nr. 1102, datë 07.11. 2017;
- krijimin e dhomës më vete për marrjen në pyetje/intervistimin e personave të shoqëruar dhe të arrestuar/ndaluar para se të dërgohen në ambientet e sigurisë, e cila të ishte e monitoruar me sistemin e kamerave audio-vizive;
- krijimin e dhomës të mjekut dhe plotësimin me materialet e nevojshme për kryerjen e vizitave mjekësore të personave të arrestuar/ndaluar në ambientet e sigurisë, si dhe,
- regjistri për evidentimin e të dhënave të personave të shoqëruar dhe personave të arrestuar/ndaluar në mjediset e policisë, nuk ishin të plotësuar me përgjegjësi dhe saktësi sipas rubrikave, kryesisht për saktësimin e orës se kur personave të shoqëruar ishte privuar liria.

Në përfundim të inspektimit grupi inspektues konstatoi se, në Komisariatin e Policisë Nr.1 vazhdojnë të jenë të pranishme disa problematika dhe konkretisht:

Ambientet e shoqërimit dhe kushtet e tyre

Në Komisarlatin e Policisë Nr.1, Tiranë ambienti i shoqërimit nuk ishte ndërtuar sipas kërkesave të përcaktuara në ligjin nr. 108/2014, “Për Policinë e Shtetit” dhe procedurën standarde “Rregullat teknike të shoqërimit në polici”, miratuar me Urdhrin e Drejtorit të Përgjithshëm të Policisë së Shtetit nr.306, datë 31.03.2016.

Në ambientin e shoqërimit kishte 1(një) dhomë e cila shërbente vetëm për shoqërimin, mbajtjen dhe trajtimin e personave të rritur. Personat e shoqëruar femra dhe të mitur, mbaheshin në zyrat e punonjësve të policisë deri në përfundim të verifikimit të rastit apo kryerjes së veprimeve procedurale për të cilat ishin shoqëruar në organin e policisë.

Institucioni i Avokatit të Popullit, referuar akteve ligjore dhe nënligjore që përcaktojnë rregullat teknike dhe standardet që duhet të plotësojë ambienti i shoqërimit, ka rekomanduar ndërtimin e dhomave të shoqërimit me sipërfaqe dhe hapësira të bollshme për shoqërimin, mbajtjen dhe trajtimin e personave në mjediset e policisë, si dhe, krijimin e dhomave të shoqërimit të ndara më vete për persona e rritur, femra dhe të miturit.² Por, nga inspektimi rezultoi se, gjëndja e kushteve dhe kapaciteteve fizike të ambientit të shoqërimit, nuk është në përputhje me standardet e miratuara në aktet ligjore dhe nënligjore.

Grupi inspektues, konstatoi se dhoma e shoqërimit ndodhej brënda godinës të komisarlatit dhe ishte e pajisur me orënditë e nevojshme si tavolinë dhe karrige të palëvizshme të fiksuara në dysheme, për qëndrimin ulur të shtetasve të shoqëruar. Ajo kishte një dritare të vetme e cila mundësonte ajrim dhe ndriçim natyral, por zgara e hekurit e vendosur në dritare ishte jo estetike dhe pothuajse e panevojshme, pasi pengonte ajrimin dhe ndriçimin e plotë të saj. Dhoma ishte pajisur me ndriçim artificial nga rrjeti elektrik. Në këtë ambient ndodhej një tualet, ngjitur me dhomën e shoqërimit, i cili nuk ishte i ndarë për femra dhe meshkuj. Dhoma e shoqërimit, nuk ishte e pastër nga ana higjenike dhe ishte e palyer.

Nga kryerja e inspektimit, rezultoi gjithashtu se në ambientin e shoqërimit mungonin kushtet bazë të përcaktuara në aktet normative si dhoma e shoqërimit më vete për femrat dhe të miturit, dhoma më vete për marrjen në pyetje/intervistimin e të shoqëruarve nga punonjësit e policisë, si dhe mungonte sistemi i monitorimit me kamera për mbajtjen në vëzhgim të korridorit dhe ambienteve të shoqërimit.

Mungesa e këtyre elementëve, mund të përbëjë shkak për përdorimin e mjeteve dhe metodave jo të përshtatshme për shoqërimin, mbajtjen dhe trajtimin e personave në mjediset e policisë, si dhe për respektimin dhe garantimin e të drejtave që ju njej ligji këtyre personave.

Ambientet e sigurisë dhe kushtet e tyre

Dhomat e sigurisë në Komisarlatin e Policisë Nr.1, Tiranë, nuk ishin të ndërtuara sipas kërkesave të procedurës standarde “Trajtimi dhe sigurimi i personave të arrestuar/ndaluar në ambientet e Policisë së Shtetit, evidentimi dhe zgjidhja e kërkesë/ankesave të tyre”, miratuar me Urdhrin e Drejtorit të Përgjithshëm të Policisë së Shtetit nr.1102, datë 07.11.2017.

² *Kreu VI, pika 3/b e procedurës standarde: “Rregullat teknike të shoqërimit në polici”*

Grupi i inspektimit konstatoi se, gjendja e dhomave në ambientin e sigurisë të komisariatit në lidhje me plotësimin e kushteve, kriterëve dhe kapaciteteve fizike sipas standardeve ligjore, nuk kishte ndryshuar nga inspektimi i mëparshëm.

Në ambientin e sigurisë kishte 3 dhoma sigurie dhe sipas informacionit të përgjegjësit të dhomave të sigurisë, këto dhoma ishin me destinacion vetëm për mbajtjen, trajtimin dhe sigurimin e personave të rritur. Kapaciteti fizik i dhomave ishte për akomodimin e 5 (pesë) personave. Personat e arrestuar/ndaluar femra dhe të mituri, pasi ju plotësohej dokumentacioni i nevojshëm nga punonjësit e policisë, dërgoheshin në dhomat e veçanta të sigurisë që ndodhet në ambientin e Drejtorisë Vendore të Policisë Tiranë.

Sipas kriterëve për ndërtimin e dhomave të sigurisë³, normat dhe parametrat teknike, jetësore e të sigurisë për një person të arrestuar/ndaluar janë që sipërfaqja e përgjithshme e ambientit duhet të jetë jo më pak se 10 m², e cila duhet të ndahet në ambient qëndrimi me sipërfaqe 6 m² dhe paradhomë me sipërfaqe 4 m². Lartësia e këtyre ambienteve duhet të jetë jo më pak se 2.5 m. Ndërkohë, nga inspektimi rezultoi se, dhomat në ambientin e sigurisë në Komisaratin e Policisë nr.1, Tiranë, nuk plotësojnë asnjë nga kriteret e mësipërme.

Dritaret e dhomave të sigurisë ishin me përmasa të vogla dhe nuk lejonin ajrim dhe ndriçim natyral të mjaftueshëm. Në këtë ambient kishte ndriçim artificial që sigurohej nga rrjeti elektrik. Gjithashtu, ato ishin të pajisura me materiale si krevate, dyshekë dhe batanije, por u konstatua se ato ishin shumë të vjetëruar. Dhomat ishin të pastra nga ana higjienike por ishin të palyera. Në ambientin e sigurisë kishte një tualet ngjitur me dhomat e sigurisë me ujë të rrjedhshëm, por mungonte uji i ngrohtë në dushe.

Në korridorin e ambientit të sigurisë ishte instaluar një telefon fiks i cili shërbente për njoftimin e zyrës së informacionit nga punonjësit e policisë që kryenin shërbenin në këtë ambient në rastet emergjente. Por, në dhomat e sigurisë mungonte butoni zile/sinjali i montuar në mur për kontaktin e personave të arrestuar/ndaluar me punonjësin e policisë në rast nevojë.

Në korridorin e ambientit të sigurisë ishte instaluar sistemi i monitorimit audio-vizive me kamera, për vëzhgimin e veprimeve të punonjësve të policisë të shërbimit në dhomat e sigurisë.

Gjithashtu, në ambientin e sigurisë nuk kishte ambient më vete për ajrimin e të arrestuarve/ndaluarve dhe mungonte ambienti që shërben si objekt kulti. Por, sipas intervistave me personat e arrestuar/ndaluar, rezultoi se atyre iu lejohej kryerja e riteve fetare brenda ambientit të dhomave.

Ambienti i sigurisë kishte gjeneratorë më vete, si burim rezervë të energjisë në rast të ndërprerjes së energjisë elektrike.

Në ambientin e sigurisë mungonte dhoma e mjekut për kryerjen e vizitave mjekësore, si dhe dhoma për marrjen në pyetje/intervistimin e personave të arrestuar/ndaluar nga punonjësit e policisë gjyqësore dhe për takime me avokatët.

³ *Kreu VIII, pika 3 e procedurës standarte "Trajtimi dhe sigurimi i personave të arrestuar/ndaluar në ambientet e Policisë së Shtetit, evidentimi dhe zgjidhja e kërkesë/ankesave të tyre".*

Nëse për ndërtimin e dhomave të reja të sigurisë në përputhje me kushtet dhe standardet kërkohen fonde buxhetore, lyerja dhe mbajtja pastër e këtyre e ambineteve është një kërkesë minimale që nuk kërkon shumë fonde dhe mund të plotësohen me mundësitë e vetë strukturës përgjegjëse në komisariatit e policisë.

Regjistri i personave të shoqëruar, ndaluar/arrestuar dhe evidentimi i tyre

Gjatë inspektimit u konstatua se, në Komisariatit e Policisë nr.1, Tiranë, “Regjistri i evidentimit të të dhënave për personat e shoqëruar” ishte sipas tipit “Model nr.1” të procedurës standarde “Rregullat teknike të shoqërimit në polici”, miratuar me Urdhrin nr.306, datë 31.03.2016 të Drejtorit të Përgjithshëm të Policisë së Shtetit dhe ishte i sekretuar.

Të gjithë personat e shoqëruar, sipas dispozitave të parashikuara në ligjin nr. 108/2014 “Për Policinë e Shtetit”, regjistroheshin në regjistër nga punonjësit e zyrave të informacionit. Nga këqyrja e këtij dokumenti rezultoi se, regjistri ishte plotësuar sipas rubrikave dhe ishte i sekretuar. Koha e qëndrimit të shtetasve në gjendje shoqërimi ishte e ndryshme nga 1 deri në 10 orë në raste të veçanta.

Ndërsa të ndaluarit/arrestuarit nga punonjësit e policisë të këtij komisariati evidentoheshin në regjistrin e personave të ndaluar/arrestuar, i cili ishte i sekretuar. Ky regjistër ishte i plotësuar me korrektësi në të gjitha rubrikat e tij.

Nga verifikimi i dy rregjistrave ku evidentohen personat e shoqëruar dhe të arrestuar/ndaluar nga punonjësit e policisë në Komisariatit e Policisë Nr.1, Tiranë, konkretisht për rastin e evidentimit të të dhënave në regjistër të personave të ndaluar nga banorët e Bashkisë Kukës në lidhje me tubimin e datë 31.03.2018 për anulimin e taksës së “Rrugës së Kombit”, Institucioni i Avokatit të Popullit, ka konstatuar shkelje lidhur me dokumentimin e orës se kur këtyre personave është privuar liria.

Konkretisht, në regjistra rezulton se këta personat kanë hyrë në mjediset e policisë Tiranë midis orës 8:00 - 9:30 të mëngjesit të datës 01.04.2018, çka do të thotë se këtyre personave duke qenë se janë banorë të Kukësit e janë ndaluar në Kukës u është privuar liria minimalisht 2 orë më parë, nëse do të marrim kohën që duhet për të përshkuar rrugën nga qendra e qytetit të Kukësit e deri në Tiranë.

Kjo praktikë, bie ndesh me rekomandimin e Avokatit të Popullit, si për rastet e ankesave të trajtuara ashtu edhe nga inspektimet e bëra në organet e Policisë së Shtetit duke kërkuar që, në rastet kur për personat e shoqëruar në organet e policisë vendoset arrestimi apo ndalimi, në procesverbalin e arrestimit në flagrancë ose të ndalimit duhet vihet ora e shoqërimit të tyre dhe jo ora kur përpilohet procesverbali i arrestimit/ndalimit.

Rekomandimet e Avokatit të Popullit janë bazuar jo vetëm në parimet universale të së drejtës dhe në parimet e përgjithshme të së drejtës tonë penale, por edhe në dispozitat konkrete të Kodit të Procedurës Penale respektivisht nenet 144, 250 dhe 259 të tij.

Trajtimi i të ndaluarve/arrestuarve dhe i të shoqëruarve në ambientet e policisë.

Në kohën e inspektimit në ambientet e shoqërimit në Komisarriatin e Policisë Nr.1 nuk kishte asnjë person të shoqëruar. Ndërsa në ambientin e sigurisë ishin 5(pesë) persona nga të cilët 3 të arrestuar dhe 2 të ndaluar. Në dy dhoma ishin vendosur nga 2 (dy) të arrestuar në një dhomë, ndërsa 1 (një) person i ndaluar ishte vendosur në dhomën tjetër.

Nga inspektimi u konstatua se, sipërfaqja dhe kubatura e dhomave të sigurisë nuk ishte e mjaftueshme për kapacitetin fizik dhe akomodimin e 5 personave. Grupi inspektues konstatoi se, për shkak të mungesës së shtretërve në dy nga dhomat kishte persona të ndaluar/arrestuar që flinin në dyshekë të vendosur në dysheme.

Gjatë inspektimit, grupi monitorues intervistoi të gjithë personat e ndaluar/arrestuar, të cilët konfirmuan se ishin trajtuar në mënyrë korrekte gjatë kohës së marrjes në pyetje nga oficerët e policisë gjyqësore dhe qëndrimit në ambientin e sigurisë. Nga të intervistuarit nuk pati pretendime për trajtim denigrues, jo human apo për ushtrim dhune fizike e psikologjike. Gjendja psikologjike e të intervistuarve ishte e qetë dhe nuk dëshmonte për pasoja eventuale të shkaktuara nga keqtrajtimi. Të intervistuarit nuk dëshmuan frikë apo druajtje për të raportuar.

Shtetasit e intervistuar kishin dijeni për identitetin e punonjësit të policisë me të cilin kishin marrë kontakt dhe kishin kryer veprimet procedurale. Ata shpjeguan se, gjatë ndalimit/arrestimit punonjësit e policisë ishin identifikuar përpara tyre duke u prezantuar me gjeneralitetet dhe detyrën që kryenin.

Koha e qëndrimit të të arrestuarve në ambientin e sigurisë ishte brenda afatit ligjor, ndërsa për personat e ndaluar për shkak të ekzekutimit të vendimeve të dënimit të tyre penal ishte bërë shkresa Drejtorisë së Përgjithshme të Burgjeve për transferimin në Institucionin e Ekzekutimit të Vendimeve Penale të vendosur nga gjykata.

Nga informacioni i dhënë nga punonjësit e policisë që shërbenin në dhomat e sigurisë dhe pyetja e personave të ndaluar/arrestuar rezultoi se, të arrestuarit/ndaluarit trajtoheshin me ushqim tre herë në ditë sipas normave për trajtimin me ushqim të përcaktuar në urdhrin e përbashkët nr. 432, datë 10.03.2008 të Ministrisë të Brendshme dhe Ministrisë të Shëndetësisë. Ushqimi sillej nga një subjekt privat me të cilin ishte lidhur kontratë.

Ndonëse në ambientin e sigurisë nuk kishte ambient kulti, të ndaluarve/arrestuarve që dëshironin u lejohej ushtrimi i riteve fetare brenda dhomave të sigurisë.

Të ndaluarve/arrestuarve iu jepeshin produkte për ruajtjen e higjienës vetjake dhe të ambientit, si sapun, detergjente, letra higjienike dhe letra për fshirjen e duarve dhe të fytyrës.

Ambientet e intervistimit

Në Komisarriatin e Policisë nr.1, Tiranë, nuk kishte dhomë më vete për marrjen në pyetje/intervistimi e shtetasve të ndaluar/arrestuar nga punonjësit e policisë, e cila të ishte e monitoruar me kamera.

Shtetasit e arrestuar/ndaluar, para se të arrestoheshin apo të ndaloheshin dhe të futeshin në ambientet e sigurisë, intervistoheshin nga oficerët e policisë gjyqësore në zyrat e punës së këtyre të fundit.

Avokati i Popullit e konsideron krijimin e dhomës më vete për marrjen në pyetje/intervistimi e shtetasve të ndaluar/arrestuar, si dhe procesin e monitorimit filmik⁴ një element parësor për mbrojtjen e të drejtave dhe lirive të njeriut, pasi ka efekt parandalues për kryerjen e veprave të dhunshme dhe të dënueshme, si nga ana e të shoqëruarve, ndaluarve e arrestuarve, ashtu dhe nga vetë punonjësit e policisë së shtetit ndaj tyre.

Po ashtu, nga monitorimi që u bë në disa prej zyrave të punonjësve të policisë që u ndodhën në këtë komisariat nuk u gjetën sende, prania e të cilave të ekspozonte dhunë ndaj personave me të cilët ata kryenin veprime procedurale.

Ndihma juridike, psikologjike dhe kujdesi mjekësor

Gjatë inspektimit u konstatua se në korridorët, në ambientin e shoqërimit dhe të sigurisë të Komisarariatit të Policisë Nr.1 ishin të afishuara material informuese (postera) me të drejtat e personave të ndaluar/arrestuar dhe atyre të shoqëruar.

Nga informacioni i punonjësve të policisë, të ndaluarit/arrestuarit dhe të shoqëruarit njiheshin me të drejtën për të pasur një avokat mbrojtës gjatë marrjes në pyetje, dhe ata që e kishin kërkuar iu ishte krijuar mundësia për të kontaktuar me të. Avokatët siguroheshin nga lista e avokatëve të dërguar nga organi i prokurorisë, e cila ishte e afishuar në zyrën e përgjegjësit të ambientit të sigurisë.

Nga intervistimi i punonjësve të policisë rezultoi se, në rastet kur të ndaluarit/arrestuarit madhorë të cilët nuk kishin mundësi financiare për të pajtuar avokat privat dhe kërkonin ndihmë juridike, atyre iu sigurohej mbrojtja me avokat kryesisht të caktuar nga prokurori sipas dispozitave të Kodit të Procedurës Penale. Ndërsa në rastet kur të ndaluarit/arrestuarit ishin të mitur ose femra, ata shoqëroheshin menjëherë për në ambientet e Drejtorisë Vendore të Policisë Tiranë, për veprime procedurale të mëtejshme.

Grupi inspektimit, zhvilloi intervista dhe me personat e arrestuar/ndaluar, të cilët deklaruan se ishin njohur me të drejtat ligjore nga punonjësit e policisë kur ishin marrë në pyetje dhe ishin takuar me avokatët e tyre.

Personave të ndaluar/arrestuarve iu ishin dhënë nga oficerët e policisë gjyqësore kopje të procesverbalit të ndalimit/arrestimit, të kontrollit personal dhe të letrës me të drejtat e tyre.

Të arrestuarve/ndaluarve u ishte bërë vizita mjekësore brënda afatit 12 orë nga mjeku i DVP Tiranë,⁵ i cili ishte i punësuar në këtë organ me kohë të plotë. Vizitat mjekësore, rekomandimet dhe mjekimet regjistroheshin në regjistrin e vizitave mjekësore që mbahej nga përgjegjësi i ambientit të sigurisë të këtij komisariati.

⁴ “Një sistem i monitorimit të vazhdueshëm i standardeve dhe procedurave të intervistave të policisë duhet vënë në zbatim, po ashtu; kjo kërkon një regjistrim të saktë të intervistave të personave në ambientet e policisë, të cilat, nëse është e mundur duhet të zhvillohen me pajisje regjistruese elektronike (audio dhe/video). Duhet të kërkohet që të rregjistrohen në mënyrë sistematike koha kur ka filluar dhe mbaruar intervista, ndonjë kërkesë të bërë nga i ndaluari gjatë intervistës, si dhe të personave të pranishëm gjatë çdo interviste.” CPT’ reports; Armenia: Visit 2010[par.18]

⁵ Kreu II, pika 7/b e procedurave standarde: “Trajtimi dhe sigurimi i personave të arrestuar/ndaluar në ambientet e Policisë së Shtetit, evidentimi dhe zgjidhja e kërkesë/ankesave të tyre”, miratuar me Urdhrin e Drejtorit të Përgjithshëm të Policisë së Shtetit nr 1102, dt. 07.11. 2017.

Gjithashtu në këtë komisariat ishte vendosur edhe regjistri i kërkesë/ankesave të personave të arrestuar/ndaluar, por nuk ishte evidentuar asnjë kërkesë apo ankesë.

Në Komisarlatin e Policisë nr.1, zbatohet detyrimi ligjor i parashikuar në nenin 109/5 dhe 122/5 të ligjit nr. 108/2014 “Për Policinë e Shtetit”, i ndryshuar, si dhe në kapitullin VII, pika a.3.4 të procedurave standarde për plotësimin dhe dhënien e procesverbalit të veprimeve të kryera me të shoqëruarit nga punonjësit e policisë që ishin ngarkuar me detyrën e kryerjes së verifikimit dhe trajtimit të çështjes përkatëse.

Sa më sipër, bazuar në pikën 3 të nenit 63 të Kushtetutës ku parashikohet se: “Avokati i Popullit ka të drejtë të bëjë rekomandime dhe të propozojë masa kur vëren shkelje të të drejtave dhe lirive të njeriut nga administrata publike” dhe në bazë të nenit 21/b të ligjit nr. 8454 dt.04.02.1999 “Për Avokatin e Popullit”, i ndryshuar, ku përcaktohet se: “Avokati i Popullit paraqet rekomandime për vënien në vend të së drejtës së shkelur tek organi administrativ, që, sipas tij ka shkaktuar shkelje të të drejtave dhe lirive”, me qëllim zgjidhjen e problemeve të konstatuara gjatë këtij inspektimi,

REKOMANDOJMË :

1. Marrjen e masave të menjëhershme për ndërtimin e ambienteve të shoqërimit, sipas kushteve dhe kriterëve të parashikuara në procedurat standarde “Rregullat teknike të shoqërimit në polici”, miratuar me Urdhrin nr.306, datë 31.03.2016 të Drejtorit të Përgjithshëm të Policisë së Shtetit, duke krijuar ambiente të përshtatshme, dinjitoze, të pajisura me orënditë e nevojshme për qëndrim, të ndara më vete për femra, meshkuj dhe të mitur.
2. Marrjen e masave të menjëhershme për ndërtimin e ambienteve të sigurisë sipas procedurave standarde “Trajtimi dhe sigurimi i personave të arrestuar/ndaluar në ambientet e Policisë së Shtetit, evidentimi dhe zgjidhja e kërkesë/ankesave të tyre”, miratuar me Urdhrin e Drejtorit të Përgjithshëm të Policisë së Shtetit nr.1102, datë 07.11. 2017.
3. Marrjen e masave të nevojshme për krijimin e ambientit që do të shërbejnë si zyrë më vete, për marrjen në pyetje dhe intervistimin e personave të shoqëruar dhe të arrestuar/ndaluar, para se të dërgohen në ambientet e sigurisë.
4. Marrjen e masave të nevojshme për vendosjen e pajisjeve të sigurisë (sisteme me kamera audio-vizive) për monitorimin e ambienteve të brëndshme dhe të jashtme të dhomave të shoqërimit dhe të sigurisë, si dhe veprimeve të punonjësve të policisë me personat që ndodhen në këto mjedise policie.
5. Marrjen e masave të nevojshme për krijimin dhe plotësimin me materialet e nevojshme të dhomës së mjekut për kryerjen e vizitave mjekësore të personave të arrestuar/ndaluar në ambientet e sigurisë.
6. Marrjen e masave të menjëhershme për instruktimin e punonjësve të policisë të informacionit në plotësimin me përgjegjësi dhe saktësi të rubrikave të “Regjistrave të evidentimit të të dhënave për personat e shoqëruar dhe të arrestuar/ndaluar”, kryesisht për dokumentimin e saktë të orës kur shtetasve ju privohet liria dhe jo kur hyjnë në mjediset e policisë.

7. Marrjen e masave të menjëhershme për krijimin e ambienteve sa më të pastra higjieno-sanitare të mjedisit dhe në dhomat ku mbahen dhe trajtohen personat e shoqëruar dhe të arrestuar/ndaluar.

Për qëndrimin që do të mbani dhe masat që do të merrni në zbatim të këtij rekomandimi, të vihemi në dijeni brënda afatit 30 ditor sipas nenit 22 të ligjit nr. 8454, datë 04.02.1999 “Për Avokatin e Popullit”, i ndryshuar.

Duke besuar në mirëkuptimin dhe bashkëpunimin tuaj.

KOMISIONER

Ermonela XHAFA